



UNIVERSITÄTS-
BIBLIOTHEK
PADERBORN

Universitätsbibliothek Paderborn

Conciliorvm Omnivm Generalivm Et Provincialivm Collectio Regia

Ab anno DCCCLXXII. ad annum DCCCCIX.

Parisiis, 1644

Epistola CLII. Ioannis Papae VIII. Ad Omnes Episcopos. Monet vt sua
instituta obseruent, iusteque iudicent.

urn:nbn:de:hbz:466:1-15967

EPISTOLA CL.

IOANNIS PAPÆ VIII.

AD AGINVLVVM EPISCOPVM GABALITANVM.

Vt præsentium latoribus ablata restituenda curet.

Ioannes Aginulfo venerabili episcopo Gebaldanensi.

PRÆSENTIVM latores questi sunt ab hac sede plebem suam eisdem sublatam. Quapropter apostolica auctoritate tuæ fraternitati præcipimus, vt inquisita rei veritate, quod iustum est, vnicuique reddere sacerdotali solitudine peruestiget: & quæ ipse diffinire non poteris, [referre ad nos] modis omnibus non prætermittas.

EPISTOLA CLI.

IOANNIS PAPÆ VIII.

AD BISVNTINENSEM ARCHIEPISCOPVM.

Significat se Fulcardum, eiusque coniugem ab excommunicatione absoluisse.

Theodorico venerabili episcopo Bisuntinensi.

NOTVM sit sanctitati vestræ, quia Fulcardum, & Berelindam vxorem eiusdem, ab excommunicationis vinculo absoluimus, donec canonica regula exacte reperiamus iudicium. Vnde a vobis in communionem eos recipi mandamus. Optamus fraternitatem vestram bene valere. Data vt supra.

EPISTOLA CLII.

IOANNIS PAPÆ VIII.

AD OMNES EPISCOPOS.

Monet vt sua instituta obseruent, iusteque iudicent.

Allocutio pontificis & exhortatio ad omnes episcopos.

ECCE sanctissimi sacerdotes præmissis precibus fraternitatem vestram cum pia exhortatione conuenio, & per diuinum nomen obtestor, vt ea quæ a nobis de Deo, & de sacris ordinibus, vel sanctis moribus fuerint dicta, cum omni pietate suscipiatis, & cum summa reuerentia perficere intendatis. Quod si forsitan aliquis vestrum aliter

quam dicta fuerint, senferit, sine aliquo scrupulo contentionis in nostrorum omnium copulatione, ea ipsa de quibus dubitauerit, conferenda reducat; qualiter, Deo auxiliante, aut doceri possit, aut doceat. Deinde simul vos obtestatione coniuro, vel obsecro, vt nullus vestrum in iudicando, aut personam accipiat, aut quolibet fauore, vel munere pulsatus, a iusto iudicio scienter auertatur aut discedat: sed tota pietate eum, qui coetui nostro se iudicandum intulerit, retractate. Vt nec discordans contentio ad subuersionem iustitiæ inter nos locum inueniat; nec in perquirenda æquitate vigor vestri ordinis vel sollicitudo tepescat. Data vt supra.

EPISTOLA CLIII.

IOANNIS PAPÆ VIII.

AD ROMANVM ARCHIEPISCOPVM
RAVENNATEM.

Præcipit vt Romam ad Synodum cum suffraganeis
accedat.

Reuerendissimo & sanctissimo confratri nostro Romano archiepiscopo sanctæ Rauennatis ecclesiæ.

CANONICIS sanctorum patrum iubentibus regulis bis
per annum Concilia episcoporum esse omnimodis celebranda; nos ob id pro multiplicibus ecclesiarum Dei utilitatibus, & necessitatibus, Synodum octauo Kalendas
Maias, Domino annuente celebrare cupimus. Ideo iubemus dilectioni vestræ, vt omni mora postposita, vos cum omnibus suffraganeis vestris episcopis prædicto tempore Romam venire studeatis: quatenus eandem Synodum nobiscum æqualiter celebretis, ac de communi salute consideretis. Data III. Nonas Martias.

Nicæni
Concilii
cap. 5.
Synodus
bis in an-
no cele-
branda.